

吴门春仲送李生还长干

钱谦益

阑风伏雨暗江城，扶病将愁起送行。
烟月扬州如梦寐，江山建业又清明。
夜乌啼断门前柳，春鸟衔残花外樱。
尊酒前期君莫忘，药囊吾欲傍余生。

金陵秋兴八首次草堂韵，

己亥七月初一作一百零四首

其一

龙虎新军旧羽林，八公草木气森森。
楼船荡日三江涌，石马嘶风九域阴。
扫穴金陵还地肺，埋胡紫塞慰天心。
长干女唱平辽曲，万户秋声息捣砧。

其二

杂虏横戈倒载斜，依然南斗是中华。
金银旧识秦淮气，云汉新通博望槎。
黑水游魂啼草地，白山新鬼哭胡笳。
十年老眼重磨洗，坐看江豚蹴浪花。

西湖杂感

板荡凄凉忍再闻？烟峦如赭水如焚。
白沙堤下唐时草，鄂国坟边宋代云。
树上黄鹂今作友，枝头杜宇昔为君。
昆明劫后钟声在，依恋湖山报夕曛。
潋艳西湖水一方，吴根越角两茫茫。
孤山鹤去花如雪，葛岭鹃啼月似霜。
油壁轻车来北里，梨园小部奏西厢。
而今纵会空王法，知是前尘也断肠。
冷泉净寺可怜生，雨血风毛作队行。
罗刹江边人饲虎，女儿山下鬼啼莺。
漏穿夕塔烟烽影，飘瞥晨钟鼓角声。
夜雨滴残舟淅沥，不须噩梦也心惊。
冬青树老六陵秋，恸哭遗民总白头。
南渡衣冠非故国，西湖烟水是清流。
早时朔漠翎弹怨，他日居庸宇唤休。
苦恨嬉春铁崖叟，锦兜诗报百年愁。

迎神曲十二首

吴人喧传瞿稼轩留守降灵郡城西，相率诣东皋招魄，塑像迎请上任，聋
駖道人惊喜，呜咽放言，作绝句十二首，用代里迎神送神之曲。

三年蜀血肯销沉？我所思兮在桂林。
却望苍梧量泪雨，湘江何似五湖深。
日蚀麒麟格斗余，山河两戒眇愁予。
兰沧渡后无消息，且坐前潮伴子胥。

圆圆曲

吴伟业

鼎湖当日弃人间，破敌收京下玉关。
恸哭六军俱缟素，冲冠一怒为红颜。
红颜流落非吾恋，逆贼天亡自荒宴。
电扫黄巾定黑山，哭罢君亲再相见。
相见初见田家，侯门歌舞出如花。
许将戚里篋笈伎，等取将军油壁车。
家本姑苏浣花里，圆圆小字娇罗绮。
梦向夫差苑里游，宫娥拥入君王起。
前身合是采莲人，门前一片横塘水。
横塘双桨去如飞，何处豪家强载归。
此际岂知非薄命，此时只有泪沾衣。
熏天意气连宫掖，明眸皓齿无人惜。
夺归永巷闭良家，教就新声倾坐客。
坐客飞觞红日暮，一曲哀弦向谁诉？
白皙通侯最少年，掠取花枝屡回顾。
早携娇鸟出樊笼，待得银河几时渡？

恨杀军书底死催，苦留后约将人误。
相约恩深相见难，一朝蚁贼满长安。
可怜思妇楼头柳，认作天边粉絮看。
遍索绿珠围内第，强呼绛树出雕栏。
若非壮士全师胜，争得蛾眉匹马还？
蛾眉马上传呼进，云鬟不整惊魂定。
蜡炬迎来在战场，啼妆满面残红印。
专征萧鼓向秦川，金牛道上车千乘。
斜谷云深起画楼，散关月落开妆镜。
传来消息满江乡，乌臼红经十度霜。
教曲妓师怜尚在，浣纱女伴忆同行。
旧巢共是衔泥燕，飞上枝头变凤凰。
长向尊前悲老大，有人夫婿擅侯王。
当时只受声名累，贵戚名豪竞延致。
一斛珠连万斛愁，关山漂泊腰支细。
错怨狂风飏落花，无边春色来天地。
尝闻倾国与倾城，翻使周郎受重名。
妻子岂应关大计，英雄无奈是多情。
全家白骨成灰土，一代红妆照汗青。
君不见馆娃初起鸳鸯宿，越女如花看不足。
香径尘生鸟自啼，廊人去苔空绿。
换羽移宫万里愁，珠歌翠舞古梁州。
为君别唱吴宫曲，江水东南日夜流！

过淮阴有感

其二

登高怅望八公山，琪树丹崖未可攀。
莫想阴符遇黄石，好将鸿宝驻朱颜。
浮生所欠止一死，尘世无繇识九还。
我本淮王旧鸡犬，不随仙去落人间。

楚两生行

黄鹄矶头楚两生，征南上客擅纵横；
将军已没时世换，绝调空随流水声。
一生拄颊高谈妙，君卿唇舌淳于笑，
痛哭长因感旧恩，诙嘲尚足陪年少。
途穷重走伏波军，短衣缚袴非吾好；
抵掌聊分幕府金，褰裳自把江村钓。
一生嚼徵与合商，笑杀江南古调亡，
洗出元音倾老辈，叠成妍唱待君王。
一丝萦曳珠盘转，半黍分明玉尺量，
最是大堤西去曲，累人肠断杜当阳。
忆昔将军正全盛，江楼高会夸名胜，

生来索酒便长歌，中天明月军声静，
将军听罢据胡床，抚髀百战今衰病。
一朝身死竖降幡，貔貅散尽无横阵。
祁连高冢泣西风，射堂宾客嗟蓬鬓。
羁棲孤馆伴斜曛，野哭无边几处闻。
草满独寻江令宅，花开闲吊杜秋坟。
鸕弦屡换尊前舞，鼙鼓谁开江上军；
楚客只怜归未得，吴儿肯道不如君。
我念邗江头白叟，滑稽幸免君知否？
失路徒贻妻子忧，脱身莫落诸侯手。
坎壈繇来为盛名，见君寥落思君友，
老去年来消息稀，寄尔新诗同一首。
隐语藏名代客嘲，姑苏台畔东风柳。

过吴江有感

落日松陵道，堤长欲抱城。
塔盘湖势动，桥引月痕生。
市静人逃赋，江宽客避兵。
廿年交旧散，把酒叹浮名。

独往
方以智

同伴都分手，麻鞋独入林。
一年三变姓，十字九椎心。
听惯干戈信，愁因风雨深。
死生容易事，所痛为知音。

楼夕
杜浚

为客曾无故，登楼亦偶然。
古城延落景，秋草上青天。
野火风吹尽，平沙日照圆。
马嘶今夜苦，归梦战场边。

扬州访汪辰初

钱秉镫

关桥乍泊旋相访，问遍扬州识者疏。
市井草深寻巷入，江城花满闭门居。
僮惊客到饶蛮语，篋付儿收只汉书。
我过七旬君逾八，笑啼同是再生余。
犹忆城隅访旧年，孤踪早上汉阳船。
一家局促三间屋，廿载崎岖万里天。
笔墨资生何处卖？艰危纪事异时传。
白头相见留深坐，又损瓶中糒米钱。

万古愁
归庄

龙吟怨

恨只恨这些左班官，平日里受皇恩沾封诰，乌纱罩着，金带横腰。今日里，一个个稽首贼廷怀揣着几篇儿劝进表。更有那叫做识字的文人，还草几句儿登极诏。那些不管事的蠢公侯，如羊似豕都押在东城隍，枷桡着追金宝。姣滴滴的女娇娆，白日里姿淫嬲；俊翩翩的缙绅儿，都牵去做供奉龙阳料。更可恨，九衢百姓悲无主，三殿千官庆早朝，万斩也难饶！

施闰章

浮萍兔丝篇

浮萍寄洪波，飘飘东复西。
兔丝冒乔柯，袅袅复离披。
兔丝断有日，浮萍合有时；
浮萍语兔丝，离合安可知！
健儿东南征，马上倾城姿；
轻罗作障面，顾盼生光仪。
故夫从旁窥，拭目惊且疑。
长跪问健儿：母乃贱子妻？
贱子分已断，买妇商山陲；
但顾一相见，永诀从此辞。
相见肝肠绝，健儿心乍悲。
自言亦有妇，商山生别离；
我成十馀载，不知从阿谁？
尔妇既我乡，便可会路歧。
宁知商山妇，复向健儿啼：
本执君箕帚，弃我忽如遗。
黄雀从乌飞，比翼长参差。
雄飞占新巢，雌伏思旧枝。
两雄相顾诧，各自还其雌。
雌雄一时合，双泪沾裳衣。

过湖北山家

路回临石岸，树老出墙根。
野水合诸涧，桃花成一村。
呼鸡过篱栅，行酒尽儿孙。
老矣吾将隐，前峰恰对门。

燕子矶

绝壁寒云外，孤亭落照间。
六朝流水急，终古白鸥闲。
树暗江城雨，天青吴楚山。
矶头谁把钓？向夕未知还。

朝雨下
吴嘉纪

朝雨下，田中水深没禾稼，
饥禽聒聒啼桑柘。暮下雨，
富儿漉酒聚侔侣，酒厚只愁身醉死。
雨不休，暑天天与富家秋，
檐溜淙淙凉四座，座中轻薄已披裘。
雨益大，贫家未夕关门卧，
前日昨日三日饿，至今门外无人过。

一钱行赠林茂之

先生春秋八十五，芒鞋重踏扬州路。
故交但有丘茔存，白杨摧尽留枯根。
昔游倏过五十载，江山宛然人代改。
满地干戈杜老贫，囊底徒余一钱在。
桃花李花三月天，同君扶杖上渔船。
杯深颜热城市远，却展空囊碧水前。
酒人一见皆垂泪，乃是先朝万历钱。

打鲥鱼二首

打鲥鱼，供上用。
船头密网犹未下，官长已鞦驿马送。
樱桃入市笋味好，今岁鲥鱼偏不早。
观者倏忽颜色欢，玉鳞跃出江中澜。
天边举匕久相迟，冰填箬护付飞骑。
君不见金台铁瓮路三千，却限时辰二十二。

九日寄徐式家

清波晃荡荻花齐，徒倚衡门独杖藜。
家在水中霜降早，船行林半鹭飞低。
凶年酒贵乡人醒，返照村空寡妇啼。
浦溆黄昏君不见，凉风衰柳思凄凄。

玉钩斜

莫叹他乡死，君王也不归。
年年野棠树，花在路旁飞。

哭王处士
朱彝尊

相送悲长别，还家惨独行。
流连简书札，次第念交情。
自有篋中作，何难身后名！
泉台应快意，未必似平生。

来青轩

天书稠叠此山亭，往事犹传翠辇经。
莫倚危栏频北望，十三陵树几曾青？

桂殿秋

思往事，渡江干。青蛾低映越山看。
共眠一舸听秋雨，小簟轻衾各自寒。

读陈胜传
屈大均

闾左称雄日，渔阳谪戍人。
王侯宁有种？竿木足亡秦。
大义呼豪杰，先声仗鬼神。
驱除功第一，汉将可谁伦？

秣陵

牛首开天阙，龙冈抱帝宫。
六朝春草里，万井落花中。
访旧乌衣少，听歌玉树空。
如何亡国恨，尽在大江东？

江皋

翠微春更湿，烟雨欲无山。
白鹭一溪影，桃花何处湾？
渔村疏竹外，古渡夕阳间。
田父不相识，相随谷口还。

民谣

白金乃人肉，黄金乃人膏。
使君非豺虎，为政何腥臊？
珠皆泪所成，不必鲛人泣。
二斛买蛮娥，余以求大邑。
初捕金五千，再捕金一万。
金尽鬻妻孥，以为府君饭。

奉送巴大将军东征逻察
吴兆骞

乌孙种人侵盗边，临潢通夜惊烽烟。
安东都护按剑怒，麾兵直渡龙庭前。
牙前大校五当户，吏士星陈列严鼓。
军声欲扫昆弥兵，战气遥开野人部。
卷芦叶脆吹长歌，雕鞬弓矢声相摩。
万骑晨腾响朱戟，千帐夜移喧紫驼。
驼帐连延亘东极，海气冥蒙际天白。
龙江水黑云半昏，马岭雪黄暑犹积。
苍茫大碛旌旗行，属国壶浆夹马迎。
料知寇兵鸟兽散，何须转斗摧连营。

秋夜师次松花江，大将军以牙兵先济，
窃于道旁寓目，即成口号，示同观诸子

落日千旗大野平，回涛百丈棹歌声。
江深不动鼉鼉窟，塞迥先驱骠骑营。

火照铁衣分万幕，霜寒金柝遍孤城。
断流明发诸军渡，龙水滔滔看洗兵。

黑林

黑林天险削难平，唐将曾传此驻兵。
形胜万年雄北极，勋名异代想东征。
废营秋郁风云气，大碛宵闻剑戟声。
历历山川攻战地，只今旌甲偃边城。

秦淮杂诗
王士禛

傅寿清歌沙嫩箫，红牙紫玉夜相邀。
而今明月空如水，不见青溪长板桥。
年来肠断秣陵舟，梦绕秦淮水上楼。
十日雨丝风片里，浓春烟景似残秋。

再过露筋祠

翠羽明珰尚俨然，湖云祠树碧于烟。
行人系缆月初堕，门外野风开白莲。

雨后观音门渡江

饱挂轻帆趁暮晴，寒江依约落潮平。
吴山带雨参差没，楚火沿流次第生。
名士尚传麾扇渡，踏歌终怨石头城。
南朝无限伤心史，惆怅秦淮玉笛声。

真州绝句

其四

江干多是钓人居，柳陌菱塘一带疏；
好是日斜风定后，半江红树卖鲈鱼。

闻蛙
倪瑞

草绿清池水面宽，终朝阁阁叫平安。
无人能脱征徭累，只有青蛙不属官。

海上杂诗
宋萃

杰阁从前代，平看碧海流。
千年留碣石，一发辨登州。
潮送斜阳落，风传绝塞秋。
倚阑聊咏志，俊鹘下荒洲。

明妃
吴雯

不把黄金买画工，进身羞与自媒同。
始知绝代佳人意，即有千秋国士风。
环佩几曾归夜月，琵琶唯许托宾鸿。
天心特为留青冢，春草年年似汉宫。

麻阳运船行
查慎行

麻阳县西催转粟，人少山空闻鬼哭。
一家丁壮尽从军，老稚扶携出茅屋。
朝行派米暮雇船，吏胥点名还索钱。
辘轳转絙出升底，西望提溪如到天。
麻阳至提溪，相去三百里。
一里四五滩，滩滩响流水。
一滩高五尺，积势殊未已。
南行之众三万余，樵爨军装必由此。
小船装载才数石，船大装多行不得。
百夫并力上一滩，邪许声中膏应折。
前头又见奔流泻，未到先愁泪流血。
脂膏已尽正输租，皮骨仅存犹应役。
君不见一军坐食万民劳，民气难苏士气骄。
虎符昨调思南戍，多少扬麾白日逃！

中秋夜洞庭湖对月

长风霾云莽千里，云气蓬蓬天冒水；
风收云散波忽平，倒转青天作湖底。
初看落日沉波红，素月欲升天敛容；
舟人回首尽东望，吞吐故在冯夷宫。
须臾忽自波心上，镜面横开十余丈；
月光射水水射天，一派空明互回荡。
此时骊龙潜已深，目眩不敢衔珠吟；
巨鱼无知作腾蹕，鳞甲闪烁翻黄金。
人间此境知难必，快意翻从偶然得。
遥闻渔父唱歌来，始觉中秋是今夕。

初入黔境，土人皆居悬崖峭壁间，缘梯上下，
与猿猱无异，睹之心恻，而作是诗

巢居风俗故依然，石穴高当万木颠。
几地流移还有伴，旧时井灶断无烟。
余生兵革逃难稳，绝塞田畴瘠可怜。
为报长官宽赋税，猕猿家息久如悬。

秦邮道中即目

不知淫潦啮城根，但看泥沙记水痕。
去郭几家犹傍柳？边淮一带已无村。
长堤冻裂功难就，浊浪侵南势易奔。

贱买河鱼还废箸，此中多少未招魂？

鱼苗船

几片红旗报贩鲜，鱼苗百斛楚人船；
怜他性命如针细，也与官家办税钱。

秣陵怀古
纳兰性德

山色江声共寂寥，十三陵树晚萧萧。
中原事业如江左，芳草何须怨六朝。

萤火
赵执信

和雨还穿户，经风忽过墙。
虽缘草成质，不借月为光。
解识幽人意，请今聊处囊。
君看落空阔，何异大星芒。

氓入城行

村氓终岁不入城，入城怕逢县令行。
行逢县令犹自可，莫见当衙据案坐。
但闻坐处已惊魂，何事喧轰来向村？
银铛杻械从青盖，狼顾狐嗥怖杀人。
鞭笞榜掠惨不止，老幼家家血相视。
官私计尽生路无，不如却就城中死。
一呼万应齐挥拳，胥隶奔散如飞烟。
可怜县令窜何处，眼望高城不敢前。
城中大官临广堂，颇知县令出赈荒；

门外氓声忽鼎沸，急传温语无张皇：
城中酒浓饔飧好，人人给钱买醉饱。
醉饱争趋县令衙，撤扉毁阁如风扫。
县令深宵匍匐归，奴颜囚首销凶威。
诘朝氓去城中定，大官咨嗟顾县令。

晓过灵石

晓色熹微岭上横，望中云物转凄清。
林收宿雾初通日，山挟回风尽入城。
客路远随残月没，乡心半向早寒生。
惊鸦满眼苍烟里，愁绝戍楼横吹声。

刈麦行
沈德潜

前年麦田三尺水，去年麦田半枯死；
今年二麦俱有秋，高下黄云遍千里。
磨镰霍霍割上场，妇子打晾田家忙。
纷纷落碓白于雪，瓦甑时闻饼饵香。
老农食罢吞声哭，三年乍见今年熟。

晚秋杂兴

蓬户炊常断，朱门廩亦空。
已判离骨肉，无处鬻儿童。
井邑征求里，牛羊涕泪中。
谁能师郑监，图绘达深宫！

出关
徐兰

凭山俯海古边州，旆景风翻见戍楼。
马后桃花马前雪，出关争得不回头。

蒙阴
厉鹗

冲风苦爱帽檐斜，历尾无多感岁华。
却向东蒙看霁雪，青天乱插玉莲花。

雨中泛舟三潭同沈确士作

一雨湖山破清晓，云外诸峰殊杳杳。
问谁著眼到空濛？只有斜风吹白鸟。
斜风忽断縠文铺，坏塔平林乍有无。
浓拖高柳三升墨，乱打新荷万斛珠。
画船低似荷花屋，瑟瑟梢梢间芦竹。
可惜今宵五月寒，不同我友三潭宿。

逃荒行
郑燮

十日卖一儿，五日卖一妇；来日剩一身，茫茫即长路。
长路迂以远，关山杂豺虎。天荒虎不饥，肝人伺岩阻。
豺狼白昼出，诸村乱击鼓。嗟予皮发焦，骨断折腰膂。
见人目先瞪，得食咽反吐。不堪充虎饥，虎亦弃不取。
道旁见遗婴，怜拾置担釜。卖尽自家儿，反为他人抚。
路妇有同伴，怜而与之乳。咽咽怀中声，唧唧口中语；
似欲呼爷娘，言笑令人楚。千里山海关，万里辽阳戍。
严城啗夜星，村灯照秋许。长桥浮水面，风号浪偏怒。
欲渡不敢撙，桥滑足无履。前牵复后曳，一跌不复举。
过桥歇古庙，聒耳闻乡语，妇人叙亲姻，男儿说门户。
欢言夜不眠，似欲忘愁苦。未明复起行，霞光影踽踽！
边墙渐以南，黄沙浩无宇。或云薛白衣，征辽从此去；
或云隋炀帝，高丽拜雄武。初到若夙经，艰辛更谈古。
幸遇新主人，区脱与眠处。长犁开古碛，春田耕细雨。
字牧马牛羊，斜阳谷量数。身安心转悲，天南渺何许？
万事不可言，临风泪如注！

姑恶

小妇年十二，辞家事翁姑。未知伉俪情，以哥呼阿夫；
两小各羞态，欲言先嚅嚅。翁令处闺阁，织作新流苏。
姑令杂作苦，扫刀入中厨。切肉不成块，■碗登盘盂；
作羹不成味，酸辣无别殊；析薪纤手破，执热十指枯。
翁曰是幼小，教导当徐徐。姑曰幼不教，长大谁管拘？
恃其桀傲性，将欺颓老躯；恃其骄纵姿，吾儿将伏蒲。
今日肆詈辱，明日鞭撻俱。五日无完衣，十日无完肤。
吞声向暗壁，啾唧微叹吁。姑云是诅咒，执杖持刀鋸。
汝肉尚可切，颇肥未为瘠；汝头尚有发，薙尽为秋壶。
与汝不同生，汝活吾命殂。鸩盘老形貌，努目真凶屠。
阿夫略顾视，便嗔羞耻无；阿翁略劝慰，便嗔昏老奴；
邻舍略探问，便嗔何与渠？嗟嗟贫家女，何不投江湖？
江湖饱鱼鳖，免受此毒荼。嗟哉无听卑，岂不闻怨呼？
人间为小妇，沉痛结冤诬。饱食偿一刀，愿作牛羊猪。
岂无父母来？洗泪饰欢娱；岂无兄弟问？忍痛称姑劬。
疤痕掩破襟，秃发云病疏。一言及姑恶，生命无须臾。

潍县署中画竹，呈年伯包大中丞括

衙斋卧听萧萧竹，疑是民间疾苦声；
此小吾曹州县吏，一枝一叶总关情。

竹石

咬定青山不放松，立根原在破岩中。
千磨万击还坚劲，任尔东西南北风。

小廊

小廊茶熟已无烟，折取寒花瘦可怜。
寂寂柴门秋水阔，乱鸦揉碎夕阳天。

白水岩瀑布

严遂成

万里水汇一水大，匍匐声闻十里外。
岩口逼仄势更凶，夺门而出悬白龙。
龙须带雨浴日红，金光玉色相荡春。
雪净蛟绡落刀尺，大珠小珠飘随风，
风折叠之绘变相，三降三升石不让。
有如长竿倒拍肉飞仙，中绝援绳跃复上。
伏犀埋头不敢出，怀宝安眠遮步障。
我欲割取此水置袖中，日恒燠若书乾封。
叩门絜瓶滴马鬃，槁苗平地青芃芃。
岂不贤于谷泉之在香炉峰，坐享大名而无功。

渡鄱阳

烟与水无际，迷茫小洞庭。
潮回三楚白，山压五湖青。
苇折雁声苦，风多鱼气腥。

扬舲一极目，何处吊湘灵？

三垂冈

英雄立马起沙陀，奈此朱梁跋扈何！
只手难扶唐社稷，连城且拥晋山河。
风云帐下奇儿在，鼓角灯前老泪多。
萧瑟三垂冈畔路，至今人唱百年歌。

秋夜投止山家

山当面立路疑穷，转过弯来四望通。
凉月满楼人在水，远烟着地树浮空。
熊羆之状乃奇石，鹤鹤有声如老翁。
清福此间殊不乏，可容招隐桂花丛。

清流关
钱载

广宁门外二千程，齐鲁河淮坦迤行。
突据冈峦高叠险，全收吴楚大江横。
南唐入宋沿州堞，西日回风度使旌。
老我重题秣陵柳，不知犹似昔年情。

山东林六七里望庐山

连峰出云云半开，奔渠卷雪响春雷。
云中屈曲明如玉，都是天池顶泻来。

望石湖

治平寺南湖翠昏，柳枝茭叶见滩痕。
楞伽不管无情雨，一夜吹花落范村。

葬花词
曹雪芹

花谢花飞飞满天，红消香断有谁怜？
游丝软系飘春榭，落絮轻沾扑绣帘。
闺中女儿惜春暮，愁绪满怀无着处；
手把花锄出绣帘，忍踏落花来复去？
柳丝榆荚自芳菲，不管桃飘与李飞；
桃李明年能再发，明年闺中知有谁？
三月香巢初垒成，梁间燕子太无情！
明年花发虽可啄，却不道人去梁空巢已倾。
一年三百六十日，风刀霜剑严相逼；
明媚鲜妍能几时，一朝飘泊难寻觅。
花开易见落难寻，阶前愁杀葬花人；
独把花锄偷洒泪，洒上空枝见血痕。
杜鹃无语正黄昏，荷锄归去掩重门；
青灯照壁人初睡，冷雨敲窗被未温。
怪依底事倍伤神？半为怜春半恼春：
怜春忽至恼忽去，至又无言去不闻。
昨宵庭外悲歌发，知是花魂与鸟魂？
花魂鸟魂总难留，鸟自无言花自羞；
愿依胁下生双翼，随花飞到天尽头。
天尽头！何处有香丘？
未若锦囊收艳骨，一抔净土掩风流；
质本洁来还洁去，不教污淖陷渠沟。
尔今死去依收葬，未卜依身何日丧？
依今葬花人笑痴，他年葬依知是谁？
试看春残花渐落，便是红颜老死时。
一朝春尽红颜老，花落人亡两不知！

桃花行

桃花帘外东风软，桃花帘内晨妆懒；
帘外桃花帘内人，人与桃花隔不远；
东风有意揭帘栊，花欲窥人帘不卷。
桃花帘外开仍旧，帘中人比桃花瘦；
花解怜人花亦愁，隔帘消息风吹透。
风透帘栊花落庭，庭前春色倍伤情；
闲苔院落门空掩，斜日栏杆人自凭。
凭栏人向东风泣，茜裙偷傍桃花立；
桃花桃叶乱纷纷，花绽新红叶凝碧。
树树烟封一万株，烘楼照壁红模糊。
天机烧破鸳鸯锦，春酣欲醒移珊枕；
侍女金盘进水来，香泉饮蘸胭脂冷。

胭脂鲜艳何相类，花之颜色人之泪；
若将人泪比桃桦，泪自长流花自媚；
泪眼观花泪易干，泪干春尽花憔悴。
憔悴花遮憔悴人，花飞人倦易黄昏；
一声杜宇春归尽，寂寞帘栊空月痕！

同金十一沛恩游霞寺望桂林诸山
袁枚

奇山不入中原界，走入穷边才逞怪。桂林天小青山大，山山都立青天外。我来六月游栖霞，天风拂面吹霜花。一轮白日忽不见，高空都被芙蓉遮。山腰有洞五里许，乘火直入冲乌鸦。怪石形成千百种，见人欲动争谿谿。万古不知风雨色，一群仙鼠依为家。出穴登高望众山，茫茫云海坠眼前。疑是盘古死后不肯化，头目手足节骨相钩连。又疑女娲氏，一日七十有二变，青红隐现随云烟。蚩尤喷妖雾，尸罗袒右肩。猛士植竿发，鬼母戏青莲。我知混沌以前乾坤毁，水砂激荡风轮颠。山川人物熔在一炉内，精灵腾蹕有万千，彼此游戏相爱怜。忽然罡风一吹化为石，清气既散浊气坚。至今欲活不得，欲去不能，只得奇形诡状蹲人间。不然造物纵有千手眼，亦难一一施雕镌。而况唐突真宰岂无罪，何以耿耿群飞欲刺天。金台公子酌我酒，听我狂言呼否否。更指奇峰印证之，出入白云乱招手。几阵南风吹落日，骑马同归醉兀兀。我本天涯万里人，愁心忽挂西梢月。

澶渊

路出澶河水最清，当年照影见东征。
满朝白面三迁议，一角黄旗万岁声。
金币无多民已困，燕云不取祸终生。
行人立马秋风里，懊恼孱王早罢兵。

秦中杂感

天府长城势壮哉，秋风落叶满章台。
一关开闭随王气，绝顶河山感霸才。
安石本为江左出，贾生偏过洛阳来。
汉朝宣室知何处？金马门前月更哀。

题元遗山集
赵翼

身阅兴亡浩劫空，两朝文献一衰翁。
无官未害餐周粟，有史深愁失楚弓。
行殿幽兰悲夜火，故都乔木泣秋风。
国家不幸诗家幸，赋到沧桑句便工。

论诗

李杜诗篇万口传，至今已觉不新鲜。
江山代有才人出，各领风骚数百年。

望罗浮
翁方纲

只有蒙蒙意，人家与钓矶。
寺门钟乍起，樵客径犹非。
四百层泉落，三千丈翠飞。
与谁参画理？半面尽斜晖。

松树塘万松歌

洪亮吉

千峰万峰同一峰，峰尽削立无蒙茸。
千松万松同一松，干悉直上无回容。
一峰云青一峰白，青尚笼烟白凝雪。
一松梢红一松墨，墨欲成霖迎赤日；
无峰无松松必奇，无松无云云必飞。
峰势南北松东西，松影向背云高低。
有时一峰承一屋，屋下一松仍覆谷。
天光云光四时绿，风声泉声一隅足。
我疑瀚海黄河地脉通，何以戈壁千里非青葱？
不尔地脉贡润合作天山松，
松干怪底——直透星辰宫。
好奇狂客忽至此，大笑一呼忘九死。
看峰前行马蹄驶，欲到青松尽头止。

狮子林歌

吴锡麟

雄雷震空六甲驱，空青塞户阴模糊。
卷毛■舌形状殊，逃尽虎豹豺狼■。
谛视细细苍苔铺，伏而不动非石乎？
陡回惊悸生欢娱，洞天咫尺开仙都。
中不百亩蛇线纡，五里十里盘崎岖。
前之升者猱附途，以踵摩顶仰可呼。
忽然索之又亡逋，白日在空午欲晡。
翻身跳入壶公壶，四壁翠洒松雨粗。
松生石隙老更腴，不阶尺土元气扶。
松耶石耶德不孤，石以松古青逼肤，
松以石怪垂龙胡。
天风来往调笙竽，满身云气留斯须。
出门舆马喧九衢，胸中了了丘壑俱。
吁嗟乎胸中了了丘壑俱，千秋画本思倪迂。

杂感
黄景仁

仙佛茫茫两未成，只知独夜不平鸣。
风蓬飘尽悲歌气，泥絮沾来薄幸名。
十有九人堪白眼，百无一用是书生。
莫因诗卷愁成谶，春鸟秋虫自作声。

金陵别邵大仲游

三千余里五年遥，两地同为断梗飘。
纵有逢迎皆气尽，不当离别亦魂消。
经过燕市成吴市，相送皋桥又板桥。
愁绝驮铃催去急，白门烟柳晚萧萧。

蒙山
孙原湘

山被云围住，围云更有山。
青连马陵树，秀入铁门关。
海近风常啸，峰高日可攀。
我来立马望，一雁正南还。

西陵峡

一滩声过一滩催，一日舟行几百回。
郢树碧从帆底尽，楚云青向橹前来。
奔雷峡断江常怒，障日峰多雾不开。
险绝正当奇绝处，壮游毋使客心哀。

十六夜雪中渡江
张问陶

故人折简近相招，一舸横江路不遥。
醇酒暗消京口雪，大帆平压海门潮。
扬州灯火难为月，吴市笙歌剩此箫。
那管风涛千万里，妙莲两朵是金焦。

幽居
邓显鹤

幽居倦人事，终日掩柴荆。
今晨理故畦，策杖思一行。
众芳亦已逞，园鸟时变声。
桃李虽不言，似识主人情。
葵堇有宿根，蓬蒿莽回萦。
稍稍濯荒秽，欣欣露繁英。
贫居甘抱瓮，循分寡所营。
机心了不萌，举足无辱荣。
藜藿吾已甘，永与汉阴盟。

除夕

僻处吾庐在，天涯乱迹经。
乾坤双鬓影，风雨一茅亭。
闻见皆卑陋，衣冠尚典型。
南山当户立，依旧两峰青。

武昌道中书感

连年河患海东隅，蠢蠢支祁未剪除。
旅食忍听淮浦雁，乡心空忆武昌鱼。
颇闻安集劳贤尹，稍见流亡复故居。
我亦州民间南北，洞庭西望倍踟蹰。

秋猎

鹰呼大漠草茫茫，野戍荒凉古战场。
猎火秋阴连塞紫，边云日落带沙黄。
风干苜蓿秋肥马，天近穹庐夜雨霜。
莫叹北平飞将老，封侯骨相本无望。

黄叶

迷离瘦影月昏黄，梦里青山是故乡。
绕舍几株新画本，盖头一把旧茅庄。
江湖满地菰蒲老，风雨经秋稻蟹香。
欲向荒村讯归路，寒鸦点点淡斜阳。

新雷
张维屏

造物无言却有情，每于寒尽觉春生；
千红万紫安排著，只待新雷第一声。

三元里

三元里前声若雷，千众万众同时来；
因义生愤愤生勇，乡民合力强徒摧。
家家田庐须保卫，不待鼓声群作气；
妇女齐心亦健儿，犁锄在手皆兵器。
乡分远近旗斑斓，什队百队沿谿山。
众夷相视忽变色：黑旗死仗难生还！
夷兵所恃惟枪炮，人心合处天心到；
晴空骤雨忽倾盆，凶夷无所施其暴。
岂特火器无所施，夷足不惯行滑泥；
下者田塍苦踣躅，高者冈阜愁颠挤。
中有夷酋貌尤丑，象皮作甲裹身厚。

一戈已搥长狄喉，十日犹悬郅支首。
纷然欲遁无双翅，歼厥渠魁真易事；
不解何由巨网开，枯鱼竟得攸然逝。
魏绛和戎且解忧，风人慷慨赋同仇；
如何全盛金瓯日，却类金缯岁币谋！

秋霖

秋霖十日失高秋，独眺江天起暮愁。
正寂寥时惟有雁，极空蒙处并无舟。
蒙蒙路滑征夫骑，漠漠寒生思妇楼。
已若阴霾害禾稼，更催霜雪上人头。

夜抵刘山人家
陈沆

行到月斜处，入门千竹林。
故人此高卧，前日约相寻。
雨过春如梦，山空夜有音。
坐深无一语，何以答同心？

扬州城楼

涛声寒泊一城孤，万瓦霜中听雁呼。
曾是绿杨千树好，只今明月一分无。
穷商日夜荒歌舞，乐岁东南困转输。
道谊既轻功利重，临风还忆董江都。

月夜游孤山

吴震

松顶一声鹤，露华满径流。
静闻空翠滴，间与片云留。
四面只通水，全山如在舟。
明明楼阁夜，有客独寻秋。

次韵答宗涤楼稷辰赠行
林则徐

岂为一身惜，将如时事何？
绸缪空牖户，涓滴已江河。
军尽惊飞镞，人能议止戈。
华严诵千偈，信否伏狂魔？
昨枉琼瑶报，驰情到雪山。
投荒非我独，寻梦为君还。
但祝中原静，奚辞绝塞艰！
只身万里外，休戚总相关。

越戍登程口占示家人

出门一笑莫心哀，浩荡襟怀到处开。
时事难从无过立，达官非自有生来。
风涛回首空三岛，尘壤从头数九垓。
休信儿童轻薄语，嗤他赵老送灯台。力
微任重久神疲，再竭衰庸定不支。
苟利国家生死以，岂因祸福避趋之！
谪居正是君恩厚，养拙刚于戍卒宜。
戏与山妻谈故事，试吟断送老头皮。

出嘉峪关感赋

其一

严关百尺界天西，万里征人驻马蹄。
飞阁遥连秦树直，缭垣斜压陇云低。
天山巉削摩肩立，瀚海苍茫入望迷。
谁道殽函千古险，回看只见一丸泥。

塞外杂咏

天山万笏耸琼瑶，导我西行伴寂寥；
我与山灵相对笑，满头晴雪共难消。

秋心
龚自珍

秋心如海复如潮，但有秋魂不可招。
漠漠郁金香在臂，亭亭古玉珮当腰。
气寒西北何人剑，声满东南几处箫。
斗大明星烂无数，长天一月坠林梢。

咏史

金粉东南十五州，万重恩怨属名流。
牢盆狎客操全算，团扇才人踞上游。
避席畏闻文字狱，著书都为稻粱谋。
田横五百人安在，难道归来尽列侯。

自春徂秋，偶有所触，
拉杂书之，漫不詮次，得十五首

其一

黔首本骨肉，天地本比邻；
一发不可牵，牵之动全身。
圣者胞与言，夫岂夸大陈？
四海变秋气，一室难为春。
宗周若蠢蠢，虢纬烧为尘，
所以慷慨士，不得不悲辛！
看花忆黄河，对月思西秦。
贵官勿三思，以我为杞人。

己亥杂诗

其一

浩荡离愁白日斜，吟鞭东指即天涯；
落红不是无情物，化作春泥更护花。

其二

太行一脉走蝥蛃，莽莽畿西虎气蹲；
送我摇鞭竟东去，此山不语看中原。

其三

九州生气恃风雷，万马齐喑究可哀！

我劝天公重抖擞，不拘一格降人才。

其四

陶潜酷似卧龙豪，万古浔阳松菊高；
莫信诗人竟平淡，二分梁甫一分骚。

夜坐

其一

春夜伤心坐画屏，不如放眼入青冥。
一山突起丘陵妒，万籁无言帝坐灵。
塞上似腾奇女气，江东久陨少微星。
平生不蓄湘累问，唤出姮娥诗与听。

秋兴十章
魏源

粟死金生孰后先，由来二物互操权。
荒年谷贸丰年玉，下赋田征上赋钱。
寒食几曾烟果断，尾闾愁说海堪填。
蜗庐外漏兼中蠹，宵拥长沙家令篇。

寰海十章

楼船号令水犀横，保障遥寒岛屿鲸。
仇错荆吴终畏错，间晟赞普詎攻晟。
乐羊夜满中山篋，骑劫晨更即墨兵。
刚散六千君子卒，五羊风鹤已频惊。

飞云岩
何绍基

乘天之云向空布，来为人间沛甘澍。
功成气猛不自收，太古阴风莽吹沍。
云欲上天天谓顽，大虚缥缈无由还。
云欲回山断根络，壑秘岩扃无住着。
忙云失势化闲云，云自无心不悔错。
幻为百千万亿云，云云一气相合分。
一云乍起一云落，一云向前一云却。
一云奋舞一云懒，一云欢喜一云愕。
大云睢盱母覆子，小云香戢鱼吹水。
丑云怩缩妍云笑，痴云疑立灵云诡。
睡云颓散欲着床，淡云散涣偏成绮。
三云四云相颉颃，十云百云不乱行。
如神如鬼如将相，如屋如塔如桥梁。
如龟蛇蛰虎兕吼，鸾凤翬■虬龙纠。
世间人我与众生，云无不无无不有。
云来西北乾坎门，性不耐寒思就温。
轩轩欲向东南奔，乘巽煦离翁以坤。
一云来翔众云萃，上不就天下无地。
若离若狎若觊觎，不疾不徐偏不坠。
百千万亿空中悬，饥饱病健相牵连。
健云扶携病云走，饱云汗出饥流涎。
涎垂汗注霏珠玉，人来云下人云触。
横奔疾走云尚在，仰自摩天俯扞足。
人共云行两不知，千百人戴云半腹。
丛丛万松插云巅，如螯赳赳负戴坚。
天风来时松乱飏，云凝不动松影圆。
白龙同云自天下，云不飞回龙亦罢。
瀑泉直飞龙所化，电激虹伸越云跨。
龙则有智云无情，云自寂然龙怒鸣。
云虽大拙乃胜巧，龙亦无术升天行。
云罅孤亭嵌■，危叶在树风可脱。
亭中呼酒人看云，酒动人停云并活。
老僧逢人说慈悲，谓千万亿云即佛。
云不见佛佛爱云，云佛佛云有伸屈。
我蹑云趾坐立眠，登巅看松胁听泉。
泉下灌田松照天，云闲无事几千年。
不嫌碍笠又妨屐，试与摩挲出润泽。
扣之有声出自魄，非木非金色苍白。
我行十里方出云，且兰早秋天正碧。
寄语看诗读记人，我所道云都是石。

元象

仰睇高峰俯瞰川，鸟飞猿渡共盘旋。
石根水怒水根石，天外山惊山外天。
形色千章乱昏昼，虚空一气作云烟；
厌观人世闲情致，元象来窥太始前。

宁羌川

回首终南尚郁苍，鞭丝帽影已新霜。
邮亭尚记金牛峡，部落空传白马羌。
漾水两源偏共岭，蜀山万点此分疆。
近城复见平川景，衰柳暗悬落日黄。

北村妇
姚燮

妾夫充水兵，战死浹江口。
愿妾怀中胎，生男续夫后。
昨夜生一男，夫死妾有子。
生男未一日，獐■遍邻里。
云贼来虜村，跣足偕逃奔。
妾死寻夫魂，杀妾贼之恩。
妾杀不足惜，妾死儿何存？
折衾手襁儿，河上行迟回。
一步一颠扑，蓬发面如灰。
妾欲还娘家，娘家路悬悬。
指拈双银钁，手招河壩船。
刁民来夺衾，并夺妾儿去。
眼看将妾儿，投弃乱流渡。

云门
郑珍

牢江驱白云，流入苍龙门。
门高一千仞，柱天气何尊！
荡荡百步中，水石互吐吞。
阿房广乐作，巨窳洪牛奔。
余波喷青壁，震怒不可驯。
眉水若处女，春风吹绿裙。
迎门却挽去，碧入千花村。
我行始两日，异境壮旅魂。
抉悬自何年？信有真宰存。
夕阳一反射，倒树明苍根。
老幅抱石花，红晕双车轮。
仰叹山水奇，俯蹶造化跟。
想见混成日，待与见者论。

发祁门杂诗二十二首
王闳运

其一

已作三年客，愁登万里台。
异乡惊落叶，斜日过空槐。
雾湿旌旗敛，烟昏鼓吹开。
独惭携短剑，真为看山来。

杂感
黄遵宪

大块凿混沌，浑浑旋大圜；
隶首不能算，知有几万年。
羲轩造书契，今始岁五千；
以我视后人，若居三代先。
俗儒好尊古，日日故纸研；
六经字所无，不敢入诗篇。
古人弃糟粕，见之口流涎；
沿习甘剽盗，妄造丛罪衍。
黄土同抔人，今古何愚贤；
即今忽已古，断自何代前？
明窗敞流离，高炉■香烟；
左陈端溪砚，右弄薛涛笺，
我手写我口，古岂能拘牵！
即今流俗语，我若登简编；
五千年后人，惊为古斓斑。

海行杂感

星星世界遍诸天，不计三千与大千。
倘亦乘槎中有客，回头望我地球圆。

今别离

其一

朝寄平安语，暮寄相思字；
驰书迅已极，云是君所寄。
即非君手书，又无君默记；
虽署花字名，知谁箝缙尾。
寻常并坐语，未遽悉心事，
况经三四译，岂能达人意？
只有斑斑墨，颇似临行泪。
门前两行树，离离到天际；
中央亦有丝，有丝两头系。
如何君寄书，断续不时至？
每日百须臾，书到时有几？
一息不相闻，使我容颜悴。
安得如电光，一闪至君旁！

哀旅顺

海水一泓烟九点，壮哉此地实天险。
炮台屹立如虎阍，红衣大将威望俨。
下有洼池列巨舰，晴天雷轰夜电闪。
最高峰头纵远览，龙旗百丈迎风飐。
长城万里此为堑，鲸鹏相摩图一啖。
昂头侧睨何眈眈，伸手欲攫终不敢。
谓海可填山易撼，万鬼聚谋无此胆。
一朝瓦解成劫灰，闻道敌军蹈背来。

梦洞庭
释敬安

昨夜汲洞庭，君山青入瓶。
倒入煮团月，还以浴繁星。
一鹤从受戒，群龙来听经。
何人忽吹笛，使我松间醒。

过洞庭湖
文廷式

舟人祷福祀灵君，我有狂言愿彻闻：
借取重湖八百里，肄吾十万水犀军。

澹如楼读书
康有为

三年不读南朝史，琐艳浓香久懒熏。
偶有遁逃聊学佛，伤于哀乐遂能文。
忤除绮语从居易，悔作雕虫似子云。
忧患百经未闻道，空阶细雨送斜曛。

出都留别诸公

其一

沧海惊波百怪横，唐衢痛哭万人惊。
高峰突出诸山妒，上帝无言百鬼狞。
岂有汉廷思贾谊，拼教江夏杀祢衡。
陆沉预为中原叹，他日应思鲁二生。

其二

天龙作骑万灵从，独立飞来缥缈峰。
怀抱芳馨兰一握，纵横宙合雾千重。
眼中战国成争鹿，海内人才孰卧龙？
抚剑长号归去也，千山风雨啸青锋！

闻意索三门湾，以兵
轮三艘迫浙江，有感

凄凉白马市中箫，梦入西湖数六桥；
绝好江山谁看取？涛声怒断浙江潮！

秋高越王台

秋风立马越王台，混混蛇龙最可哀。
十七史从何说起，三千劫几历轮回。
腐儒心事呼天问，大地山河跨海来。
临睨飞云横八表，岂无倚剑叹雄才！

离台诗
丘逢甲

其一

宰相有权能割地，孤臣无力可回天。
扁舟去作鸱夷子，回首河山意黯然。

其三

卷土重来未可知，江山亦要伟人持。
成名竖子知多少，海上谁来建义旗？

天涯

天涯断雁少书还，梦入虚无缥缈间。
兵火余生心易碎，愁人未老鬓先斑。
没番亲故沧沧海，归汉郎官遁故山。
已分生离同死别，不堪挥泪说台湾！

愁 云

云极目昼成阴，飞鸟犹知恋故林。
破碎山河收战气，飘零身世损春心。
封侯未遂空投笔，结客无成枉散金。
梦里陈书仍痛哭，纵横残泪枕痕深。

岁暮杂感

其六

一曲升平泪万行，风尘戎马厄潜郎。
民愁竞造黄天说，岁熟如逢赤地荒。
七贵五侯金穴富，白山黑水铁车忙。
老生苦记文忠语，多恐中原见鹭章。

春愁

春愁难遣强看山，往事惊心泪欲潸。
四百万人同一哭，去年今日割台湾！

铁汉楼怀古

瘴云飞不到城头，庵圯楼荒客独游。
并世已无真铁汉，群山犹绕古梅州。
封章故国回天恨，梦寐中原割地愁。
欲倚危栏酌杯酒，程江呜咽正东流。

七律

梦入女儿江上村，马缨一树正垂门。
扫红小径人初出，纤碧新词律细论。
一院荫迷飞絮影，双钩香印落花痕。
风筝吹坠东墙角，惊觉犹劳为断魂！

元夕无月

其一

满城灯市荡春烟，宝月沉沉隔海天。
看到六鳌仙有泪，神山沦没已三年。

湘君
李希圣

青枫江上古今情，锦瑟微闻呜咽声。
辽海鹤归应有恨，鼎湖龙去总无名。
珠帘隔雨香犹在，铜驼经秋梦已成。
天宝旧人零落尽，陇鸡辛苦说华清。

望帝

玄菟城头紫气横，长沙月照国西营。
天边马角无消息，海外龙髯有死生。
贡使祇应供夏葛，归期犹及荐春樱。
烟花绕径今如昨，莫道张衡续两京。

有感一章
谭嗣同

世间无物抵春愁，合向苍冥一哭休。
四万万人齐下泪，天涯何处是神州！

崆 峒

斗星高被众峰吞，莽荡山河剑气昏。
隔断尘寰云似海，划开天路岭为门。
松擎霄汉来龙斗，石负苔衣挟兽奔。
四望桃花红满谷，不应仍问武陵源。

狱中题壁

望门投止思张俭，忍死须臾待杜根。
我自横刀向天笑，去留肝胆两昆仑。

龙门峡
赵熙

出郭二十里，入山千万重。
遥寻瀑布水，忽听松林钟。
石涸樵生路，云开雁过峰。
传闻葛由侣，于此伏虬龙。

药池

药池仙渌草萋萋，浣罢香痕翠鸟啼。
一去藐姑人不见，海棠红遍寺门西。

昀谷太守之蜀，作下里词送别

春水依人万里桥，枇杷门巷倚晴皋。
井泉染得花笺色，便疑桃花是薛涛。

山行杂诗二首

芳洲一水净无尘，何处桃花不是春。
满地夕阳归路尽，此中宜有避秦人。
山上苏亭望转遥，市声浓处雨痕消。
碧澜寸寸皆秋浦，何处青山是板桥。

狱中赠邹容
章炳麟

邹容吾小弟，被发下瀛州。
快剪刀除辫，干牛肉作■。
英雄一入狱，天地亦悲秋。
临命须掺手，乾坤只两头。

无题
林旭

海上今年二月寒，出门何地有花看。
思先清晓车轮转，意共黄昏烛本阑。
世界愁风复愁雨，肝肠为苦亦为酸。
东邻巧笑频相讶，倚枕哀吟故未宽。

携眷登南岳观音岩作
曾广钧

宝山珠殿插青天，万朵红莲礼白莲。
一片空岚罩云海，全家罗袜踏苍烟。
烧香愿了花侵马，礼佛人归月上弦。
更忆海南千叶座，天风引舰近真仙。

落叶词十二首

甄官一夕沦秦玺，疏勒千年出汉泉。
凤尾檀槽陪玉辇，龙香宝络殉金钿。
文鸾去日红为泪，轻燕仙时紫化烟。
十月帝城飞木叶，更于何处听哀蝉。
赤栏回合翠沦漪，帝子精诚化鸟归。
重壁招魂伤穆满，渐台持节召真妃。
清明寒食年年忆，城郭人民事事非。
宝瑟流泉弹别凤，寒鱼哀雁尽惊飞。

泰山玉皇顶
杨圻

鸡鸣日出接天关，绝顶疏钟云汉间。
气合大荒心似海，身临上界目无山。
九州寂寂孤僧睡，片石峨峨万古闲。
便欲抠衣通帝座，手扶碧落看人寰。

题五洲地图

入门屋大乾坤窄，八荒四极在我室。
手们五岳皆平地，坐视沧海忽壁立。
悦如上界一俯瞩，三分尘土水居七。
又如置身洪荒前，当时不见一人迹。
昆仑之外原无山，余气磅礴散万脉。
东南诸国临大水，西北川原岂终极！
乃知大块非无垠，直若盆水浮败叶。
关塞古今称形胜，自我视之皆智力。
图中斑驳五色分，人种国界辨明晰。

世上沿革血染成，此图变更乍朝夕。
人间无日无干戈，一万年知何色？
起来取图裂粉碎，无地存身计亦得。
回顾新月照空墙，似闻吴质嫦娥微叹息。

观瀑亭
陈曾寿

百丈飞泉挂一亭，岩栏危坐俯冥冥。
松身独表诸天白，石气寒嘘太古青。
涧草无心来鸟啄，梵潮如梦起龙腥。
元坛真宰愁何事，滃涌炉香会百灵。

胡斋坐雨

隐几青山时有无，卷帘终日对跳珠。
瀑声穿竹到深枕，雨气逼花香半湖。
剥啄惟应书远至，宫商不断鸟相呼。
欲传归客沉冥意，写寄南堂水墨图。

赤壁怀古
秋瑾

潼潼水势响江东，此地曾闻用火攻。
怪道依来凭吊日，岸花焦灼尚余红。

感事

竟有危巢燕，应怜故国驼。
东侵忧未已，西望计如何？
儒士思投笔，闺人欲负戈。
谁为济时彦？相与挽颓波。

黄海舟中日人索句并见日俄战争地图
万里乘风去复来，只身东海挟春雷。
忍看图画移颜色？肯使江山付劫灰！
浊酒不销忧国泪，救时应仗出群才。

拼将十万头颅血，须把乾坤力挽回。

日人石井君索和即用原韵

漫云女子不英雄，万里乘风独向东！
诗思一帆海空阔，梦魂三岛月玲珑。
铜驼已陷悲回首，汗马终惭未有功。
如许伤心家国恨，那堪客里度春风。

柬某君

河山触目尽生哀，太息神州几霸才！
牧马久惊侵禹域，蜚龙无术起风雷。
头颅肯使闲中老？祖国宁甘劫后灰？
无限伤心家国恨，长歌慷慨莫徘徊。

住西湖白云禅院作此
苏曼殊

白云深处拥雷峰，几树寒梅带雪红。
斋罢垂垂浑入定，庵前潭影落疏钟。

寄晦闻

忽闻邻女艳阳歌，南国诗人近若何？

欲寄数行相问讯，落花如雨乱愁多。

有怀

玉砌孤行夜有声，美人泪眼尚分明。
莫愁此夕情何限，指点荒烟锁石城。
天生成佛我何能？幽梦无凭恨不胜。
多谢刘三问消息，尚留微命作诗僧。

莫愁湖寓坐

清凉如美人，莫愁如月镜。
终日对凝妆，掩映万荷柄。

本事诗十章

其九

春雨楼尽尺八箫，何时归看浙江潮？
芒鞋破钵无人识，踏过樱花第几桥？

有感八首

汪荣宝

兰陵祭酒口谈贤，结客名都半少年。
刘向校经攻百两，牟长著录过三千。
连鸡雅擅纵横策，乘马还分甲乙篇。
从此燕齐迂怪士，始知海外有神仙。
风送朝珂近玉除，承明谒帝此权舆。
初闻贾谊叨前席，别诏刘安进外书。
反袂伤麟无复尔，持刀厌虎竟何如！
孤芳只恐经秋歇，多种江蓠与揭车。
天路新标进善旌，四星高傍帝星明。
科条许罢周监谤，典故教修宋迹英。
滋味不曾尝腐鼠，风波忽已动长鲸。
绝怜一卷家人语，珍重临朝致太平。
早倦离宫听八琅，炉香扇影不曾忘。

金根归驾秋传讯，玉检灵书夜吐芒。
重起甘龙修废典，却劳扁鹊制神方。
水衡新奏云斤枝，未许寒鸦度苑墙。
觚棱回首日西曛，哀痛天书不忍闻。
自是桐宫甘罪己，何尝丹穴苦熏君。
银珰夜醉开东阁，玉卮朝飞试北军。
欲叩九阍诉真宰，迢迢银汉有浮云。
十五句圆夜动摇，■衣逐捕隶兵骄。
杜周刀笔须深刻，陶侃戎衣竟寂寥。
坐见刊章收北寺，虚闻对簿就东朝。
弋人岂得忘缯缴，已有飞鸿在九霄。
斩关空复破卢罍，早辟灵符咒避兵。
闻得珠襦临武帐，公然玉貌去危城。
甘泉豹尾萦魂梦，沧海鸱夷变姓名。
縹马阗风应返顾，高邱无女泪纵横。
风筝一夕动清商，相对南冠泣数行。
黄犬旧游悲上蔡，碧鸡霸业黯陈仓。
莫同秦客论孤愤，私托湘累续九章。
青史他年有公论，诗成未敢下雌黄。

客有道秋舫故妓事者，感叹赋四律
孙景贤

十样蛮笺纪事新，月坊风陌省前尘。
楼名重译标南部，户聚三星拱北辰。
长爪教量沧海浅，细眉愁见远山颦。
绿衫年少休轻薄，谁倚鹅笼顷刻身。
双凤城西一水斜，狄鞮妙绝旧倡家。
新妆巧作朝天髻，故锦轻縻奉使槎。
秘殿仓根深宿燕，明湖高树少藏鸦。
游人目送金车过，错认天家女史花。
赭衣元鬓意难平，但祝啼乌似有情。
太学党人初逐捕，灞陵老将昔知名。
罪标青简冤难洗，骨腐缣囊裹不成。
一样楚囚应对泣，燕支零乱异平生。

